

Uunga siunnersuut: Aningaasarsianit akileraarutit pillugit Inatsisartut inatsisaata allangortinneqarneranik Inatsisartut inatsisaat

(Aningaasaqarnermut, Naligiissitaanermut, Aatsitassanut, Inatsisillu Atuutsinneqarnerannut Naalakkersuisoq)

Saqqummiussissut**Siullermeerneqarnera**

Aningaasarsianit akileraarutit pillugit Inatsisartut inatsisaata allangortinneqarneranik Inatsisartut inatsisissaattut siunnersuut Naalakkersuisut matumuuna saqqummiuppaat.

2023-mut aningaasanut inatsisissaq pillugu isumaqatigiisummi immikkoortut ilagaat, nunanit allanit aningaasaliisoqartarnera 2023-miilli aallartittumik siuarsarneqassasoq nunanillu allanit aningaasaleerusuttunut aporfissat peerneqassasut.

Siunnersuutip matuma aningaasanut inatsit pillugu isumaqatigiisummi immikkoortoq taanna ilaatigut pilersinniarpaat.

Siunnersuummi siunnersuutaavoq kapitali 3 b-mik nutaamik ilanngussisoqassasoq. Kapitalip imaraa aaqqissuussineq ingerlatseqatigiiffinnut aatsitassarsiornerup, erngup nukingata aamma sermip erngullu niuernikkut iluaqutigineqarnissaasa iluanni atuinissamut akuersissutinik pigisaqartunut atuussinnaasoq. Pineqartunuttaaq ilaapput ingerlatseqatigiiffiit suliffissuarni innaallagissamik annertuumik atuillutik tunisassiornermik, tassungaluunni qanimut attuumassuteqartumik ingerlatallit. Pineqartut toqqarneqarnerannut pissutaavoq nunanit allanit aningaasaliisussat aamma immikkut ilisimasat tamakkunatigut inuussutissarsiutinik ineriartortitsinissamut aningaasarsiornerullu pitsanngoriartuinnarnissaanut pingaaruteqarluinnartuunerat.

Ingerlatseqatigiiffiit aaqqissuussinermi pineqartunut ilaajumanerlutik nammineq piumassusertik malillugu aalajangissavaat.

Ingerlatseqatigiiffiit aaqqissuussinermit ikaarsaarumasut iluanaarutisariatititik ilanngaatisinnaassanngilaat, akerlianilli iluanaarutisiat akileraarutaannik appasinnerusunik akiliisassallutik. Ingerlatseqatigiiffinnullu nammineq pigisanut akileraaruteqanngitsumik iluanaarutisianik tunniussisinnaaneq taakkunanilu pissarsisinnaaneq atuutilersinneqassaaq. Aaqqissuussineq taamaalilluni akileraartiteriaatsinut aningaasaliisartut nunani allani ilisimariigaannut sanilliunneqarsinnaanerussaaq. Ilutigisaanik Kalaallit Nunaanni sinneqartoorutit ingerlatallu Kalaallit Nunaannissaaq akileraaruserneqarnissaat qulakkeerneqarpoq.

Aaqqissuussinerup aamma nunanit allanit aningaasaliisussat, marloriaammik akileraarnissaaq pinngitsoorniarlugu isumaqatigiisutit atsiueqataaffigisimasavut malillugit iluanaarutisianit akileraarutitigut oqilisaassiffigineqarsinnaanerat annertusisissavaa. Iluanaarutinit akileraartinneqarneq taamaalilluni minnerulissaaq, tamannalu Kalaallit Nunaanni aningaasaliinissamik orniginarnerulersitsissaaq. Kalaallit Nunaata nunanit allanit soqutigineqarnerulernera ilutigalugu nunat

allat marloriaammik akileraarnissaq pinngitsoorniarlugu Kalaallit Nunaannut isumaqatigiissuteqarumallutik kissaateqarnissaat naatsorsuutigissavarput.

Taakku saniatigut allattaq akileraartarnermi inatsisitigut oqilisaassissutigineqarluarsinnaasut periarfissaapput.

Taamaattumik siunnersuutaavoq annikitsumik aningaasalersuisarnermut inatsit pillugu maleruagassaq qasukkarneqassasoq. Maleruagassat maanna atuuttut malillugit suliffeqarfiup erniatigut ilanngaatissai ikilisinneqartarput ingerlatseqatigiiffimmut piginnitsiminut, ingerlatseqatigiiffimmut piginnitsimi pigisaanut il.il. akiitsui suliffeqarfiup nammineq aningaasaataasa marloriaataannit amerlanerugaangata. Siunnersuutip kingunerissavaa erniatigut ilanngaatissanik ikilisisineq aatsaat pisassasoq akiitsut nammineq aningaasaatit 80 pct.-init amerlanerugaangata. Allannguutip kingunerissavaa nunatsinni suliffeqarfiit ingerlatseqatigiiffimmit piginnitsiminnit il.il. taarsigassarsinermikkut ingerlataminnik aningaasalersuinissamut periarfissaqarnerunissaat. Taarsigassarsinissamut periarfissaqarneruneq aningaasarsionnikkut ingerlatat pitsaanerulernissaannik kinguneqarniartussaavoq. Maleruagassaq siunnersuutip kingunerisaanik Europami nunat maleruagassaannut sanillunneqarsinnaanerulissaaq. Siunnersuutaavortaaq ukiuni siusinnerusuni akileraarutitigut amigartoorutit ukiut tulliuuttut tallimani ilanngaatigineqarsinnaanerit, piumasaqaatit aalajangersimasut atuutsillugit ukiunut sivitsorneqassasoq.

Siunnersuutip taakku saniatigut imarai allannguutissatut siunnersuutit allat, pingaarnersuinnarlugit maanna naatsumik oqaluuserissavakka.

Sulisitsisup akiligaanik angalanerit akileraaruserneqartarnerat atorunnaarsinneqassasoq siunnersuutaavoq. Tassani akiliunneqarluni angalanerit taaneqartartut aamma pineqarput. Siunnersuutikkut akiliunneqarluni angalanerit pillugit nalunaaruteqartarnerup akileraarusiisarnerullu allaffissornikkut suliakkersuutaanerannik millisitsinissaq anguniagaavoq. Sulisitsisup sulisullu angalanerit qanoq akulikitsiginissaat pillugu isumaqatigiissuteqartarnerat siunnersuutip kingunerisaanik eqaallisarneqassaaq, angalanerit sulisunut akileraaruteqarnissaannik kinguneqanngikkaluamik. Siunnersuut aamma taamaalilluni sulisut noorarnersinnaanerannik annertusaaqataassaaq.

Ernianik akileraarusiisarnermik atuutilersitsinissaq siunnersuutaavoq. Ingerlatseqatigiiffiit Kalaallit Nunaanni angerlarsimaffeqartut akiitsoqarfimmut nunami akileraarutikiffiusumiittumut ernianut akiliutimik akileraarutaat siunnersuut malillugu unerartittassavaat. Kiisalu siunnersuut akileraarusiinnginnissanik allanik arlaqartunik imaqarpoq.

Tulliatut siunnersuutaavoq ingerlatseqatigiiffiit nalikilliliisarnerat pillugu maleruagassanik qasukkaallunilu sukaterisoqassasoq. Siunertaavoq nalikilliliisarnerit pillugit maleruagassani maanna atuuttuni ikiorsiinertut taasariallit annikillisarneqarlutillu siunertaqarnerulersinneqarnissaat. Maleruagassattaq allaffissornikkut suliakkersuutaanerit siunnersuutip millisitseqataaffigissavaa.

Siunnersuut tassungalu oqaaseqaatit naggataagut innersuussutigaakka.

Taamatut oqaaseqarlunga siunnersuut Inatsisartunut suliassanngortippara.